

Мерейтойға үлес қосайық!

«Тойдың болғанынан боладысы қызық» дегендей, Төртүй ауылының 90 жылдық мерейтойы қарсаңында әр сәрсенбі сайын ұйымдастыру комиссиясының отырысы өткізіліп тұрады. Осыған дейін үш отырысқа округ әкімі Ж.Ибраев қатысып келсе, осы жолғы жиынға қала әкімінің кеңесшісі Е.Қабылтаев қатысты.

Жұмыс комиссиясының құрамына Төртүй ауылында еңбек еткен ардагерлер: М.Ерғалиев, С.Айтымов, А.Масығұтов, Т.Топанов, К.Төлеков, Б.Түсіпова, сондай-ақ, ауыл түлектері С.Занов, М.Манатов кірген. Ауылдағы дайындық шараларын ұйымдастыру ауыл ақсақалы З.Саржановқа жүктелді.

Ауыл мектебінің әр жылғы түлектері туған ауылдың мерейтойына өз үлестерін қосуда. Мысалы, 1982 жылғы түлектер ауылға кіреберіс қақпа орнатса, 1985 жылғы түлектер ауыл мешітін жөндеуге қаражат жинады. Ауылдың тумасы Ораз Қойшин ауыл асханасын салу туралы жобасын ортаға салды.

Осы жолғы жиынға 1977 жылғы түлектер де өз үлестерін қосуға ниет білдіруге келіпті.

Тағы да бір жағымды жаңалық: сонау Германия елінен бұрынғы жерлестеріміз, неміс

ұлтының өкілдері ауылдың мерейтойы жайлы құлақтанып, қуанып жатқандарын жеткізіпті. Кезінде ауылдың өркендеуіне үлес қосқан неміс азаматтары: егіс бригадасының бригадирлері Кондрат Редхер, Василий Майер, Арнольд Таушь, Штейдле, Андрей Деньгоф, Андрей Класснер (бұл екеуі қазақшаға сұдай болатын), Василий Гиндер, Август Сайбель, Карих, бақша өсірушілер Давид Зайбель пен Андрей Функ, т.б. есімізде. Олардың ұрпақтары тойға қатысуға мүмкіндіктері болмаса да, ақшалай сыйсияпат көрсетеміз деп құлшынып отырған көрінеді. Бұл да тілі, діні басқа болса да, біртұтас ел болғандықтың, бір кездегі ұлттар арасындағы татулығымыздың белгісі деп ойлаймын.

Жерлестеріміздің назарына:

Ауыл тарихы туралы кітапқа материал жинауға үлес қосыңыздар!

Әр сәрсенбі сайын сағат 17.00-де қалалық ардагерлер кеңесінің жанындағы «Замандас» клубында комиссия отырысы өтеді. Материалды жинау мерзімі осы жылдың 1 қыркүйегінде тоқтатылады.

**Бәтжамал Түсіптегі,
комиссия мүшесі**